

Inatsisartut suleriaasianni § 33 naapertorlugu aalajangiiffigisassatut siunnersuut manna matumuuna Naalakkersuisunit saqqummiunneqarpoq:

Namminersorlutik Oqartussat missingiummut uunga isumaqataanissaat pillugu

Inatsisartut aalajangiiffigisassaattut Siunnersuut

Kalaallit Nunaannut Pinerluttulerinermik Inatsisip allanngortinnissaa pillugu

**Inatsisissatut Siunnersuut (Killiligaanngitsumik eqqartuussat allallu
inissinneqartnererat)**

(Ilaqtariinnermut, Naligiissitaanermut, Isumaginninnermut Inatsisinillu atuutsitsinermut Naalakkersuisoq)

Tunngavilersuut

Nuummi pineqaatissinneqarsimasunut inissiisarfimmi nutaami killiligaanngitsumik inissiisarfissap killiligaanngitsumik eqqartuussanut pingaarnertut inissiisarfissatut ingerlalernissaa qulakkeerneqassasoq aalajangiiffigisassatut siunnersuummi anguniarneqarpoq.

Killiligaanngitsumik eqqartuussat Nuummi inissittalernerisigut Danmarkimut killiligaanngitsumik eqqartuussat inissittarnerat unissaq.

Inatsisissatut siunnersuut immikkoortunik pingaarnernik makkuninnga imaqarpooq:

- Danmarkimi killiligaanngitsumik inissitassatut eqqartuussat pinerluttulerinermik inatsimmi periarfissinneqartnerat atorunnaassaaq, killiligaanngitsumillu eqqartuussat Kalaallit Nunaanni isertitsivimmiiinnissaat erseqqissumik tunngavilerneqassaaq.
- Killiligaanngitsumik eqqartuussat inatsisit massakkut atorneqartut malillugit Danmarkimi parnaarussassatut eqqartuunneqartut angerlartinnissaannut inatsisitigut tunngavissaqalissaaq. Piumasarineqassaaq nuussineq aatsaat pisinnaassasoq killiligaanngitsumik eqqartuussaaq tamatuminnga kissaateqarlunilu akuersisimappat.
- Killiligaanngitsumik eqqartuussat isertitsivinni ammasuni killiligaanngitsumik eqqartuussanut immikkoortortamut nuunneqarsinnaalissapput pineqartoq nuunneqartussatut piareertutut nalilerneqarpat. Taamatuttaaq parnaarussat immikkoortortamiit ammasumit killiligaanngitsumik eqqartuussanut immikkoortortamut nuunneqarsinnaassapput tamanna sillimaniarnikkut pisariaqartinneqassappat.

Naalakkersuisut inatsisissatut siunnersuummut oqaaseqaataat

Nunatsinni ileqqoraarput pinerluttulerinermi inatsisitigut pineqaatissiisarnerni pillaanissaq siunertarineqarneq ajormat, paarlattuanilli inunnutakuuleqqinnissaq kissaatigineqartarmat. Naalakkersuisunut pingaaruteqarpoq killiligaanngitsumik eqqartuussat inunnutakuuleqqinnissaannut, inuiaqtigiainnullu uterteqqinnissaannut periarfissilluarneqarnissaat.

Naalakkersuisut isumaqarput inunnut akuulersitseqqinniarneq periarfissaqarnerpaajussasoq pineqaatissiineq Kalaallit Nunaanni ingerlanneqarpat, matumanilu Danmarkimi Herstedvester Fængselimi sivisuumik inissiineq aqutiginagu.

Ukiuni qulikkaani arlaqartuni killiligaanngitsumik eqqartuussat Kalaallit Nunaannit Danmarkimi parnaarunneqartussanngorlugit aallartitaasarnerat ajornartorsiutinik pilersitsisarmat sammineqartuarsimavoq, taamaaliortoqarneranimi eqqartuunneqartoq kulturi, oqaatsini ilaqtutanilu qimallugit ungasissumut aallartinneqartarmat. Pineqaatissinneqartunut ilaquaasunullu tamanna immikkut pineqaatissiinertut annertuutut misigineqarsinnaasapoq, tassami pineqaatissinneqartut Herstedvester Fængselimut aallartinneqartillutik qaugu Kalaallit Nunaannut uteqqissanerlutik imaluunniit ilaqtattik qaugu takoqqissanerlugit nalusarmassuk. Arlalinnit nalilerneqareerpoq kalaallit killiligaanngitsumik eqqartuussat Danmarkimut nuunneqartarnerat ilaquaqarsinnaanermut pisinnaatitaaffik pillugu artikel 8-mik Den Europæiske Menneskeretskonvention-imiittumik unioqquitsinerusoq.

Isertitsivissap nutaap atulerneratigut killiligaanngitsumik eqqartuussat Kalaallit Nunaanni inissittarnissaat siunissami periarfissaalissaq - illorsorneqarsinnaasumik. Killiligaanngitsumilli eqqartuussat pineqaatissinneqarsimasunut inissiisarfimmut eqqortumik inissinnissaat qulakteerniarlugu pisariaqarpoq killiligaanngitsumik eqqartuussanut pinerluttulerinermik inatsimmi malittarisassat allanngortinnissaat.

Tamannalu tunngavigalugu aalajangiiffigisassatut siunnersutip akuersissutigineqarnissaa Naalakkersuisut inassutigaat.

Pisortanut aningaasatigut allaffissornikkullu kingunerisassat.

Siunnersut Nunap Karsianut aningaasaqarnikkut sunniuteqassanngilaq.

Aningaasaqarnikkut allaffissornikkullu namminerisamik inuussutissarsiutilinnut kingunerisassat
Soqanngilaq

Innuttaasunut aningaasaqarnikkut allaffissornikkullu kingunerisassat

Soqanngilaq

Tusarniaaneq

Tusarniaanermi matumani Justitsministeeriaqarfik naalagaaffimmi oqartussaasunut danskillu soqutigisaqartuinut tusarniaatitsisisimavoq. Isumaginninnermut, Ilaqutariinnermut Inatsisinillu Atuutsitsinermut Naalakkersuisoqarfik aamma kalaallit oqartussaasuunut tusarniaatitsisisimavoq.